

ter Corcyrae obsidionem, in qua nihil a barbaris vel ad crudelitatem durius, vel ad avaritiam crudelius prætermissum est; Nauplii, & Epidauri urbes petite, agri vexati, Cyclades insulae, quæ Veneto parebant imperio, pene omnes occupatae: & tamen qui adiutores ad immensum hoc pondus sustinendum nobis fuere? Bellum cum potentissimo, atque immani hoste gerendum nobis erit, cujus terrestres maritimæque vires tanta jamdiu incrementa susceperunt, ut formidinem Christianis Principibus incusserint. Cur igitur de concordia cum hoste ineunda prius non decernitur? quæ si æquis conditionibus obtineri queat, quis non certam pacem difficillimo, ac periculosissimo bello antetulit?

Ad hæc Marcus Foscarus, Consilii Sapiens: quin penes Senatum summa totius Reipublicæ sit, ambigere neminem; nihil subdole, aut ex composito a Collegii Patribus agi; an non Senatusconsultum de fœdere factum fuisse? qui, cum Suleimanus a Salentinis in Corcyraeos, mutata sententia, expeditionem moliretur, Pontificem, & Cæsarem ad societatem ineundam incitavit; fœdusque Romæ, ac Venetiis cunctorum Christianorum plausibus adversus Turcas indictum est. An modo mandata flagitantibus minime respondendum? quæ prudenter decreta fuere, delenda prorsus, ac rescindenda sunt? Scilicet, quo universum in nos tantum bellum incumbat, nullis sociis, nullis adiutoribus cum hoste dimicemus; qui quo majoribus, uti Gradonicus asserere visus est, viribus nititur, ut iis obistere soli nequimus, eo magis reliquorum Principum amicitiam, & societatem amplecti debemus. Mirandum non esse, si adhuc itineris longinquitate a Cæsare literæ minime acceptæ fuerint. At Pontifex se in concilio kal. maji de expeditione in Turcas agere instituit. Num igitur mittenda ob id ad legatum mandata non sunt, quibus in rem Christianam bene animato vehementiores gloriæ, atque utilitatis stimuli addantur? At Canalis literis respondendum; de pace cum Suleimano agendum est. Id porro Collegii quoque Patres censere, ab æquis conditionibus concordie non abhorreere: verum, quod maxime instat, id modo ut perficiatur, adnitendum. Quis enim barbaræ genti confidat, quæ teterrimo odio in Christianos imbuta, nihil non quotidie in illorum exitium molitur;

cujus

Marci Foscarioratio.